

CONSELH GENERAL D'ÒUT E GARONA

Decision modificativa n° 1
Julhet 2009

**Mocion prepausada per Marcèl CALMETA,
Conselhièr General del canton de Montflanquin
al nom del grope de Majoritat Departamentala Novèla**

La mitat de las 6 700 (sièis-mila-sèt-cent) lengas parladas al jorn d'anuèi dins lo monde son menaçadas de desaparéisser abans la fin del sègle.

Las lengas son una de las esplechas principalas de l'umanitat per totas las interaccions possiblas, e per exprimir d'idèas, d'emocions, de coneissenças, de sovenenças e de valors. Las lengas son tanben portairas de las expressions culturalas e del patrimòni cultural immaterial, que son essencials per l'identitat de las personas e dels gropes.

L'UNESCO declarava 2008 «Annada de las lengas ». L'organizacion mondiala a establìt un Atlàs mondial de las lengas en perilh dins lo monde. Dins aquel atlàs, l'UNESCO a repertoriat las lengas d'Occitania : lo gascon es « en perilh », e lo lemosin, l'auvernhat, lo lengadocian, lo provençal e lo francoprovençal son « seriosament en perilh ».

Las mesuras simbolicas presas dinca ara per l'Estat en favor de las lengas minoritàrias son pas a la nautor de la situacion. La transmission de la lenga occitana a arrestat de se far dins las familhas. Dins Òut e Garona, coma dins Aquitània, la lenga e la cultura occitanas son en perilh de desaparéisser.

L'occitan es prigondament ligat al patrimòni identitari d'Òut e Garona. Fòrça autors de lenga d'òc son aicí los testimònis de la vivacitat passada de la lenga d'òc.

Las collectivitats publicas an la responsabilitat de la preservar.

Lo Conselh General d'Òut e Garona

- **conscient** que la cultura occitana presenta una riquesa plan granda, ditz son inquietud de vere l'occitan desaparéisser.
- **considèra** que la salvagarda de las lengas en perilh es un aspècte fonamental de la preservacion de la diversitat cultural dins lo monde.
- **vòl promòure lo plurilingüisme**, en respectant l'emplec del francés, lenga de la Republica, per son implicacion dins l'Amassada, creada pel Conselh Regional d'Aquitània.
- **en consequéncia, damanda** que l'Occitan siá inserich per l'UNESCO sus la tièra del patrimòni cultural immaterial de l'Umanitat en perilh d'extincion.